

- 15 vnd ordenleichen halden,  
solt er darumb geliten han.  
es must nach seinen eren gan  
nach wiriden vnd nach staten  
ich wil trewen raten
- 20 sein lob man ticht, les vnd schreib,  
wer gesacht mit chrankchem leib.  
lant vnd lewt an falschen pein  
mit ern so gewaltig sein  
als er mit chranches leibes chraft
- 25 getrew, stât vnd warhaft,  
die hielten im der eren stul  
daz er in fawler schanden phul  
hat nie geneczt chainen füz,  
wo man durch roter munde gruz
- 30 den schimpf erdacht durch hohen müt.  
ze hant der edel furste güt  
pot maniger rainen frawen zart,  
daz man ze hof sich liepleich schart  
durch frewenreiches mieten
- 35 er pot vnd hiez gepieten  
uil manigen minnichleichen weib  
durch frewd durch lust durch laid uertraib  
durch ritterleiches werben,  
nu im mocht nit uerderben
- 40 pei stiller per fröleich sit,  
dem fursten folget mit  
trew vnd zucht mas vnd scham  
warhait vnd stât gehorsam  
erparmt vber die armen diet,
- 45 er was als im die weisheit riet  
gottleiches dinstes fleizzig.  
sein hercz ward nie sleizzig  
an gottes dinst no jugent,  
daz er mit rainer tugent
- 50 göttleicher lieb mit uorchten phlag  
piz her an seinen lezten tag.  
daz in der tot mit grimer that  
des lebens gar beraubet hat.